



Gabinete Wever - Croes II

ISLAONLINE


Noticia di Gobierno

2023

Dialuna 6 November 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



Prome Minister a reuni cu Arubahuis

ARUBAHUIS PRONTO LO BIRA MAS FUERTE Y MAS STABIEL

Durante su estadia na Hulanda, Prome Minister Evelyn Wever-Croes a tuma e oportunidad pa reuni na Arubahuis cu Minister Plenipotenciario sr. Ady Thijsen hunto cu e personal, pa asina por scucha di nan, kico ta relevante. Manera ta conoci, Arubahuis ta representa Aruba na Hulanda y na Europa, pesey ta importante pa e ta fuerte y stabiel. Ultimo tempo, Arubahuis a pasa den momentonan hopi dificil, cu investigacionnan interno y administrativo, pero awor, tur esaki ta tras di lomba y por sigui cu positismo padilanti.



Prome Minister a indica cu durante e reunion, e personal a expresa nan preocupacion pa loke a pasa den pasado, pero a siguranan cu desde awor, lo bay traha pa fortifica Arubahuis, pa algo asina no pasa nunca mas. E aspectonan pa cu nombracion di e director nobo, ta den su etapa final, y pa 1 di december, Arubahuis lo tin su director nobo, cu lo traha na crea un Arubahuis mas stabiel y cu forsa pa sigui dilanti.

Prome Minister ta gradici sra Glenda Hernandez cu a fungi como e director interino, pa a acepta e propuesta di Gobierno pa keda un par di luna mas, cu finalmente a resulta den un periodo mas largo. Gobierno di Aruba ta sumamente agradeci na su persona y ta reconoce su esfuerzo den trece e tranquilidad y estabilidad cu tanto tabata tin mester. Arubahuis, pronto lo drenta den un etapa nobo, na unda cu e director nobo hunto cu Minister Plenipotenciario lo traha hunto cu ekipo completo pa crea un Arubahuis mas fuerte y stabiel. ■



Prome Minister Evelyn Wever-Croes: Reunion cu Buitenlandse Zaken na Hulanda tabata positivo A YEGA NA PALABRACIONNAN CON PA SIGUI TRAHA HUNTO RIBA E TEMA DI RELACION EXTERIOR

Recientemente, Prome Minister Evelyn Wever-Croes a biaha pa Hulanda pa atende varios reunionnan, di cual un importante ta e reunion cu Buitenlandse Zaken. Mirando cu Aruba tin un director nobo na Directie Buitenlandse Betrekking (DBB), cu ta sra. Jocelyne Croes, ta importante pa yega na cierto acuerdonan, entre e dos instancianan aki. Prome Minister a indica cu e reunionan cu Buitenlandse Zaken a bay hopi bon, na unda a yega na acuerdo con pa fortifica DBB pa asina Aruba tambe por yuda y duna di su parti den Reino.

Prome Minister a expresa di por a nota cu Buitenlandse Zaken na Hulanda tin un respet grandi pa Aruba, y pa e maneho cu e Gobierno aki ta hibando. Nan ta desea di sigui traha cu pais Aruba, y kier pa nos yudanan cu otro paisnan den region. Un otro bon noticia ta, cu nan lo bay yuda Aruba cu e atraso cu tin den cierto tratadonan cu ta hopi urgente. Un di e tratadonan ta esun di Istanbul, cu ta un tratado na unda paisnan a palabra, y bay di acuerdo, pa bin cu mas medida pa asina frena y evita abuso di hende muhe. Violencia domestico, specialmente contra e ser femenino. Esaki ta un tratado cu Aruba kier rectifica y implementa lo mas pronto posibel, y awor tin e compromiso cu nan lo bay yuda cu esaki. E otro tratado cu nan lo bay yuda cune, ta e "kinderontvoeringsverdrag" cu ta e tratado riba secuestro di muchanan. Sigur un tratado sumamente importante pa pais Aruba.

Otro topico cu tabata riba agenda na momento cu a toca temanan di region, ta Venezuela. Premier Wever-Croes a indica cu por nota cu despues cu tabata tin e acuerdo di Barbados, Merca a cuminsa lanta algun sancion pa 6 luna, si Venezuela tene su mes na palabracionnan, cual lamentablemente no ta e caso. Pa loke ta pais Aruba, nos mester ta cauteloso, pa asina evita di bay depende un biaha mas, riba un pais cu cualkier momento por dal frontera sera. Gobierno di Aruba ta trahando riba e trayecto pa habri frontera bek, na un forma serio, responsabel y cu ta safe pa tur hende.



"Finalmente mi mester bisa di ta sumamente satisfecho cu e cooperacion cu Aruba tin cu Buitenlandse Zaken. Pami e tabata un honor di a wordo invita pa habri nan conferencia "Shaping the Feminist Foreign Policy", cu ta e maneho di relacion exterior cu paisnan cu no ta respeta derecho di hende muhe, cu un discurso. Aki tambe Aruba y Buitenlandse Zaken a yega na bon palabracionnan con pa sigui traha hunto pa atende cu temanan di Relacion Exterior. Un conferencia hopi positivo" Prome Minister a expresa.

Prome Minister Evelyn Wever-Croes:

SEÑORA JOSELIN CROES LO TA E PROXIMO DIRECTOR DI ARUBAHUIS

Señora Croes lo asumi su posicion entrante 1 di December 2023



Durante conferencia di prensa di Gobierno, Prome Minister Evelyn Wever-Croes a anuncia cu Arubahuis lo tin su director nobo pa comienso di December 2023. Pa cu e posicion aki, a cuminsa un proceso di nombracion na Juni 2022, cu a culmina na November 2023, den un decision na favor di sra Joselin Croes. Manera ta conoci, Arubahuis ta representacion di Aruba, na Hulanda, y e mision di Gobierno pa Arubahuis ta pa tin un Aruba visibel na Hulanda, den Reino y na Europa. Pa logra esaki e meta aki, Aruba tin su Minister Plenipotenciario, den nomber di sr Ady Thijsen, y awor un director nobo, cu ta sra Joseline Croes.

Prome Minister a splica cu e nombramento di sra Joselin Croes tabata un vacatura cu a wordo publica den Juni 2022. Gabinete Wever-Croes basa riba integridad, a tuma e decision di no haci e nombracion aki uno politico, manera añanan anterior, sino habri e vacatura pa diferente candidatonan por solicita, ya cu pa sirbi e vision y mision di Arubahuis miho, ta necesario pa tin un persona eynan independiente di cua Gobierno ta sinta. Pa cu e proceso di nombracion, Gobierno a introduci un comicion cu tabata encarga cu e proceso aki, cu tabata consisti di Departamento di Recurso Humano, Departamento di Impuesto y un representante di Ministerio di Asuntonan General. Un total di 23 persona a solicita, y basa riba e criterionan, a escohe 3 candidato, cu a bay door di un entrevista na unda cu a escohe sra Joselin Croes como e miho candidato pa e posicion aki.

Na oktober 2022, e comicion a aserca Prome Minister, cu ta encarga cu Arubahuis, pa presenta e proposicion aki, y na Februari 2023, e proposicion aki a wordo aproba pa Consejo di Minister. Despues di esaki, a haci algun investigacion mas, incluyendo esun di Veiligheidsdienst, cual tambe a sali positivo.

Prome Minister a splica cu sra Joselin Croes ta actualmente e Minister Plenipotenciario pa Aruba na Washington. Durante

e ultimo cinco añanan, sra Croes a traha hopi duro riba promove y crea oportunidadnan pa Aruba y pa Arubianonan, cu partnernan na Merca. Akinan riba e terenonan economico, innovacion, cultural, enseñansa y tambe area diplomatico. Un di e metanan principal di sra Croes tabata pa Aruba fortifica lazonan cu Merca y Canada, y pa saca mas probecho posibel di esaki. Sra Croes prome cu su funcion na Washington tabata Chief of Staff di Minister di Husticia, y prome cu esey e tabata tin su propio oficina di abogado. Aparte di ta abogado e tin aworaki tambe su Masters Degree den Environmental Management. Sra. Croes ta conoci pa su determinacion, positivismo, pasion, y disciplina pa logra su metanan. E ta domina 4 idioma y tin e curiosidad pa siña mas idioma y cultura di otro paisnan.

"Mi ta desea sra Joselin Croes hopi exito, den e funcion nobo aki, cu el lo cuminsa December proximo. Tambe mi kier gradici sra Glenda Hernandez cu a tuma e encargo di director interino pa un periodo mas largo di loke nos a pidie na comienso. Señora Hernandez a sa di trece estabilidad y tranquilidad na Arubahuis, y pa esaki, nos ta gradici su persona. Cu e nombracion di e director nobo, Arubahuis ta laga un periodo dificil atras, y ta sigui cu positivismo padilnati. Di mi curason un danki na tur empleado y staff completo di Arubahuis pa tur nan esfuerzo y dedicacion" Prome Minister a expresa.





Prome Minister Evelyn Wever-Croes: **PRINSES BEATRIX TA BISHITA ARUBA E SIMAN AKI**

Dialuna mainta durante conferencia di prensa di Gobierno, Prome Minister Evelyn Wever-Croes a anuncia cu diahuebs awor, 9 di November, Aruba lo ta ricibiendo bishita di Prinses Beatrix. E bishita aki no lo ta igual na e bishita di Rey Willem Alexander hunto cu Reina Maxima y Prinses Amalia, sino e lo ta un bishita mas cortico y intimo.

Prome Minister a indica cu Prinses Beatrix ta biniendo Aruba riba invitacion di Dutch Caribbean Nature Alliance, cu lo ta acompaña su persona pa bishita e otro islanan den Caribe. E agenda pa e dia aki ta inclui bishita na Telefon pa Hubentud, y riba su propio iniciativa, Prinses Beatrix, bishita un "speeltuín" pa wak con esakinan ta bay. Tambe, durante su estadia e lo participa na e congreso di DCNA cu lo tuma luga na Universidad di Aruba.

Premier Wever-Croes a expresa cu Aruba sigur ta honra cu e bishita di Prinses Beatrix, y lo ta presente pa salud'e den nomber di henter e pueblo di Aruba.





E FORSA DI UN COMUNIDAD TA BIN DI SU PRINCIPIONAN DI INCLUSION



Muestra bibo di nos democracia ta den e derecho igual di tur hende pa manifesta nan opinion y sentimentonan na Pais Aruba. Ta netamente e mesun derecho igual aki ta locual ta den discusion. Gobierno di Aruba tin e tarea di scucha su ciudadanonan y na mes momento garantiza cu derechonan universal di cada ser humano ta wordo honra. Cada persona den Gobierno y Parlamento a priminti di sirbi nos pais respetando nos constitucion.

Manera ta conoci, Parlamento lo trata e concepto di ley pa haci matrimonio entre pareha di mesun sexo posibel. Gobierno ta siguiendo e desaroyo aki di cerca y ta scuchando diferente opinion for di pueblo.

"Como vice-minister president, representando Gobierno di Aruba, mi por bisa cu mescos cu den comunidad, den e

gabinete por tin diferente pensamiento individual riba e tema di matrimonio entre pareha di mesun sexo. Pero manera nos Minister President a indica den su discurso na Den Haag, Pais Aruba ta boga y lo sigi boga pa igualdad pa hende muhe, e comunidad LBGTQIA+ y tur otro grupo marginalisa. Desde 2017 nos a boga pa Igualdad y inclusion cu ta balornan clave den un comunidad cu tin compasion pa nan prohimo.

Minister Ursell Arends y Minister Geoffrey Wever a ricibi e manifesto di lidernan religioso dilanti bestuurskantoor y lo comparti esaki den conseho di minister. "E lo haya su debido atencion, igual na e atencion cu nos ta duna esnan cu un otro opinion," Minister Arends ta termina.



Ministerio di Cultura y Comision Celebracion Dianan Nacional a anuncia: **"SINTERKLAAS Y PIETNAN DI COLOR TA YEGA ARUBA DIADOMINGO 19 NOVEMBER PA 3'OR DI ATARDI"**

Dialuna atardi durante un Conferencia di Prensa Comision Celebracion Dianan Nacional y Ministerio di Cultura a anuncia cu recientemente nan a ricibi e carta oficial di Sinterklaas cu e fecha y orario cu nan lo yega Aruba.

Sinterklaas y Pietnan ta hopi contento cu un biaha mas nan ta bishita Aruba pa saluda y laga regalo y mangel pa tur mucha. Sinterklaas a informa cu e aña aki e te yega Aruba riba bispo di celebracion di "Dia Internacional di Derecho di Mucha", diadomingo 19 di november y debi na e situacion di tempo nan lo yega Aruba pa exactamente 3'or di atardi na e entrada principal di APA.

Despues cu e Sinterklaas y Pietnan wordo ricibi pa Minister di Finanzas y Cultura mr. Xiomara Maduro lo sigui un parada riba L.G. Smith Boulevard acompaña pa Massive Brassband, Musica, Grupo di Pitbull Productions y Guccie Dancers cu lo duna presentacion di baile y canta riba e ruta hunto cu tur e pietnan di colo. E parada lo wordo anima pa Tanchi Esmee cu lo percura pa tur e alegria riba caminda resalta den un ambiente unico yena cu colo y fantasia.

Pa 4:30pm e show di mucha ta cuminsa riba Renaissance Market Place anima pa Tio George cu diferente gruponan di baile y artistanan infantil. Mientras cu show ta cuminsa tur mucha lo por warda Sint y su Pietnan na Renaissance Market Place pa saca potret den un bunita photobooth cu lo wordo crea. Renaissance Market Place ta percura pa tur mucha haya gratis "pop corn" y "cotton Candy". Tambe lo tin Dino Jump pa



nos muchanan por disfruta e dia bunita aki.

CCDN kier a gradici na Sra. Ruth Gaarie y Pitbull Productions pa e bunita cancion dedica na e celebracion di Sinterklaas y Piet titula 'Sint y Piet trece colo' cu pronto por wordo scucha na tur radio emisora. Danki special na Departamento di Cultura, Ministerio di Cultura, Unoca, Aruba Bank, Renaissance Market Place, APA, DOW, Rode Kruis y Cuerpo Policial cu un biaha mas ta haci e bishita di Sinterklaas y Pietnan posibel na Aruba.



Dangui Oduber
MINISTER

FIRMAMENTO DI MOU ENTRE GOBIERNO DI ARUBA Y CAAM-HP



Diaberna atardi Minister di Turismo & Salud Publico, sr. Dangui Oduber, hunto cu Minister di Enseñansa sr. Endy Croes y sra. Loma Parkins, directora di “The Caribbean Accreditation Authority for Education in Medicine and Other Health Professions” (CAAMP-HP) a firma un acuerdo pa asina apunta e organo di acreditacion CAAMP-HP, pa acredita scolnan di medicina cuta establece nan mes na Aruba pa garantiza e calidad y nivel di educacion.

E mandatario a menciona cu Aruba tin diferente facultadnan di medicina cu basicamente ta prepara studiantenan pa e prome fasenan di nan examen na Merca. E organo Mericano cu ta supervisa e calidad di educacion di medicina pafo di Merca, esta e “Education Commission for Foreign Medical Graduates” (ECFMG), a determina cu entrante 2024 e facultadnan cu kier wordo certifica door di ECFMG mester ta acredita pa institutonan reconoci door of den nomber di ECFMG.

CAAM-HP ta un otro instituto cu ta wordo reconoci door di ECFMG y cu por evalua e curriculum di educacion y acredita facultadnan di medicina. Awo cu CAAM-HP ta situa den region esaki ta pone cu e ta mas accesibel pa e facultadnan di medicina por establece na Aruba. E acuerdo di MOU entre Gobierno di Aruba y CAAM-HP, ta amplia e posibilidadnan pa facultadnan di medicina por wordo acredita y asina garantiza e nivel di e educacion ofreci door di e facultadnan aki.

Minister sr. Dangui Oduber ta gradici colega Minister Endy Croes pe bon coperacion pa a brinda e plataforma pa asina mas institutonan di medicina por establece nan mes na Aruba y percurando cu e acreditacion ta reconoci pa e calidad y nivel di educacion cu ta wordo brinda. Ministerio tambe ta gradici sr. Andin Bikker pa tur su esfuerso pa a completa e MOU.

Minister Dangui Oduber

Minister Dangui Oduber:

HOMENAHE NA SR. KUIPERI PA SU DEDICACION NA TURISMO

Diahuebs atardi Minister di Turismo y Salud Publico, sr. Dangui Oduber, a atende un evento bunita cu a wordo organisa door di famia y amistadnan pa duna homenahe na sr. Michael Kuiperi. Un anochi di dobel celebracion, unda a celebra e trayectorio remarcabel di sr. Kuiperi den e industria di turismo, y alaves a celebra sr. Kuiperi su cumpleaños.

Sr. Michael Kuiperi ta un di e pioneronan den turismo na Aruba dentro e historia y desaroyo di nos pais. Sr. Kuiperi tin hopi experiencia y amor pa turismo, musica, cultura, historia y sin falta afor pa su pais Aruba.

Sr. Michael Kuiperi tawata e prome director di e oficina di Turismo di Aruba. E la laga un marca impresionante den e industria di turismo pero tambe den aviacion, cultura y hopi proyectonan creativo pa e isla.

E biahe di sr. Kuiperi ta uno largo pero impresionante y cu hopi logronan. Un di e logronan mas notable di Sr. Kuiperi tabata su compromiso pa pone Aruba riba mapa mundial. E la compronde e importancia di presenta cultura y talento di Aruba na audiencia internacional. E tabata e prome pa invita artistanan sobresaliente di Aruba, manera Padu Lampe, Eddy Toppenberg y hopi mas pa representa Aruba na Ferianan Internacional di Turismo.

Ademas, Sr. Kuiperi a habri caminda pa aerolinea for di merca pa establece rutanen directo pa Aruba, asina mehorando e accesibilidad pa mas turista por bishita Aruba. Pero su vision a yega mas leu cu solamente promocion di Aruba, sr. Kuiperi a reconoce e conexion intimo entre turismo y cultura, su vision tabata pa e desaroyo di turismo mester bin hunto cu desaroyo di cultura y conservacion di nos naturalesa.

Sr. Kuiperi su pasion, resiliencia, spiritu inovativo a haci un impacto significativo y pa esaki Aruba ta berdaderamente agradecido.

Minister di Turismo y Salud Publico, sr. Dangui Oduber, tin su profundo aprecio na tur e logronan di sr. Kuiperi y su trabou duro den e industria di turismo. Sr. Kuiperi su vision y dedicacion no a solamente pone Aruba riba mapa mundial, sino tambe a transforma Aruba den un pais unda soñonan ta bira realidad pa e bishitante y nos habitante nan. E mandatario ta agradecido pa e aña nan di servicio, pa e contribucion y exito di nos pais Aruba.



“Masha Danki Michael Kuiperi! Sr. Kuiperi su legado lo bria pa semper den curason di Aruba.”
– sr. Dangui Oduber



MINISTER ENDY CROES TA DESEA SR. EDSON HATO HOPI EXITO COMO REPRESENTANTE NOBO DI VNO PA ARUBA, CURAÇAO Y SINT MAARTEN

Diaranson atardi, Vertegenwoordiging van Nederland in Oranjestad (VNO) a organisa un bunita recepcion pa yama bonbini na Sr. Edson Hato. Minister Endy Croes tabata presente na Universidad di Aruba durante e recepcion. Tambe presente na e ocasion special aki, tabata colega Minister Geoffrey Wever, Presidente di Parlamento di Aruba mr. Edgard Vrolijk, miembronan di Parlamento di Aruba, hefe di departamentonan di gobierno y demas invitadonan special. Sr. Edson Hato ta di nos hermana isla Curaçao y a biba hopi aña na Hulanda.

Pues, Sr. Hato tin conocimiento di e idioma y cultura di e region Caribense. Sr. Hato a eherce hopi funcion rond di mundo y awo ta representante nobo di Hulanda na Aruba, Curaçao y Sint Maarten (VNACS). Sr. Hato tin experiencia amplio den guia di proceso di cambio y desaroyo di liderazgo den multinacionalnan grandi y companianan social. Sr. Hato a eherece e funcion di consehero y a traha na, entre otro, Carlsberg Group, ABN AMRO Bank, ING Group y AstraZeneca. Na aña 2017 Sr. Hato a funda LikeMinds B.V., un oficiona di conseho pa guia personanan den posicion di liderazgo, desaroyo di organisacion



y transformacion di empresa. Finalmente, Minister Endy Croes ta felicita Sr. Hato cu su encargo nobo y ta dese'e hopi exito den e etapa nobo aki pa fortifica e relacion entre Aruba y Hulanda.

MINISTER ENDY CROES TA FELICITA E ALUMNONAN DI OAA CU A RICIBI NAN CERTIFICADO DI ARUBA CERTIFICATION PROGRAM

Diaranson atardi, Minister Endy Croes a presencia entregamento di certificado na e participantenan cu a finalisa e programa di Aruba Certification Program (A.C.P.) cu exito. E topiconan cu a wordo presenta na e alumnonan di OAA durante 9 sesion tabata: Aruba su naturalesa y hendenan, Aruba su cultura, Aruba su simbolonan nacional y percepcion intercultural, Aruba su estructura politico, Aruba su turismo, Aruba su caracteristicanan, Aruba su servicio cordial, Aruba su naturalesa y desaroyo sostenibel y Aruba su historia di industrianan. Aruba Excellence Foundation a duna e prome curso na e grupo di 16 participante cu a wordo selecta a traves di AFBA pa haya un trabou den e sector di F&B.

Manera ta conoci, Openbare Avondleergangen (OAA) den colaboracion cu Aruba Food & Beverage Association (AFBA) a lansa pa prome biaha un programa innovativo y educativo unda cu a combina e experiencia practico y estudio. E programa ta pa persona di 17 aña bay ariba cu ta desea di drenta den e sector di "Food & Beverage". E programa tin un duracion di 1 aña pa un aña y mey. Ora e participantenan finalisa nan estudio nan lo ricibi e diploma di Assistent Horeca, Voeding of Voedingsindustrie Crebonummer 25742. E programa ta encera cu e participantenan ta traha 39 ora pa siman den un establecimiento cu ta miembro di AFBA y lo dedica seis (6) ora semanal na les presencial na OAA. Cual ta suma un total di 45 ora pa siman. OAA a integra un enfoque moderno, haciendo e programa digital, cu ta permiti pa e studentenan siña riba nan mesun tempo. Pa conclui, Minister Endy Croes ta felicita e participantenan cu a ricibi nan certificado y ta desea nan hopi exito cu nan estudio! Alabes, mandatario di Enseñansa ta gradici Aruba Excellence Foundation, OAA y AFBA cu e bunita proyecto aki cu ta yuda prepara e participantenan pa un otro nivel y pa e trabounan den e sector di F&B.



MINISTER ENDY CROES A HACI UN BISHITA OFICIAL NA INSTITUTO PEDAGOGICO ARUBANO



Diaranson ultimo, Minister di Enseñansa y Deporte Endy Croes a haci bishita oficial na Instituto Pedagogico Arubano (IPA). IPA ta un scol superior riba nivel di HBO cu ta ofrece, entre otro, estudio pa Maestro di Enseñansa Primario, Bachelor Nederlands als Vreemde Taal y Curso di Certificacion Pedagogico Didactico (PDG). Na yegada na e scol, e mandatario di Enseñansa a wordo ricibi cu un caluroso bonbini. Durante e bishita, Minister Endy Croes a reuni cu directora di IPA Sra. Marilyn Richardson y director di estudionan inicial Sr. Berthson Boekhoud pa dialoga tocante diferente topico di interes di e scol. Tambe, Minister Endy Croes a haya un recorrido rond di ful e scol pa mira e lokaalnan, deficiencia den e parti di infraestructura y algun trabou realisa recientemente.



Ademas di esaki, e mandatario di Enseñansa a bishita un les di Enseñansa Primario di e materia Vakdidactiek voor Natuur en Techniek en Mens Maatschappij di e docentenan Sr. Gregory Richardson y Sra. Mirscha Winterdal. Por ultimo, a reuni cu e team di IPA, unda cu nan a haya e oportunidad di haci pregunta y trece nan inquietud- y preocupacionnan dilanti. Minister Endy Croes a contesta nan preguntanan y a duna un splicacion breve di e proyectonan andando pa mehora e calidad di enseñansa na Aruba. Pa finalisa, Minister Endy Croes ta gradici directora di IPA Sra. Marilyn Richardson, director di estudionan inicial Sr. Berthson Boekhoudt y e team di IPA pa e caloroso recibimento, alabes ta desea e docente- y studiantenan un exitoso aña escolar 2023 – 2024.



Minister Endy Croes: PREMIO EXCELENCIA DEN DEPORTE 2022 CU TA TUMA LUGA DIA 10 DI NOVEMBER PROXIMO

Diabierna atardi, durante Conferencia di Prensa di Gobierno di Aruba Minister Endy Croes a presenta Premio Excelencia den Deporte (PED) 2022. Presente na e ocasion aki tabata vice presidente di Parlamento Sr. Raymond Kamperveern, Parlamentario Sr. Alvin Molina, directiva di diferente federacion, IBISA, FFD, FLPD, SSA, Departamento di Enseñansa, Inspectie Onderwijs, atletanan nomina y demas invitadonan special.

Premio Excelencia den Deporte ta reconoce e atletanan cu mas a destaca den nan disciplina durante aña 2022. Pa aña 2022 un total di 29 federacion a manda nomber di nan atletanan cu mas a destaca. E nominadonan ta wordo reconoci dia 10 di november den un anochi di gala dedica specialmente na nan. Minister Endy Croes a enfatisa cu e aña aki e interes tabata hopi grandi, unda cu 29 federacion a manda oficialmente nan nominadonan conforme e rekisitonan. Un total di 130 atleta ta nomina den diferente categoria pa aña 2022.

Comision di hurado:

E comision encarga pa scoge e ganadonan ta consisti di cinco profesional cu tin e afinidad den prensa deportivo. E rekisitonan pa saca e ganadonan ta basa riba e siguiente reglamentonan: 1. prestacion local, 2. prestacion internacional y 3. prestacion den comunidad di Aruba.

Un premio nobo:

Pa prome biaha ta introduci e categoria entrenado di aña unda cu lo reconoce 27 entrenado pa nan contribucion den e desaroyo di deporte di Aruba.

Ceremonia oficial:

Durante e ceremonia di gala cu ta tuma luga dia 10 di november proximo den Renaissance Convention Center lo otorga diferente premio, entre otro, medaya y certificado pa tur e 130 nominadonan, plakkaat pa e 13 ganadonan, plakkaat



pa e 27 entrenadonan, plakkaat na e 10 baluartenan deportivo y premionan efectivo. Durante e anochi special aki lo rindi homenahe na 10 baluarte deportivo cu a dedica gran parti di nan bida den deporte di Aruba. Tambe, 7 atleta olimpico lo ricibi un certificado y pin for di World Olympians Association pa nan esfuerzo haci pa promove e balornan olimpico.

Pa finalisa, Pueblo di Aruba ta keda cordialmente invita pa sintonisa e anochi mas grandi den deporte di Aruba dia 10 di november cuminsando pa 8or di anochi en bibo via nos planta nacional Tele Aruba y Canal 22.



Minister Endy Croes:

A FIRMA UN MOU CU THE CARIBBEAN ACCREDITATION AUTHORITY FOR EDUCATION IN MEDICINE AND OTHER HEALTH PROFESSIONS (CAAM-HP)

**CAAM -HP ta e instancia cu lo controla y acredita e universidadnan
di medicina na Aruba**

Diabierna atardi, durante Conferencia di Prensa di Gobierno di Aruba, Minister di Enseñansa y Deporte Sr. Endy Croes hunto cu colega Minister di Turismo & Salud Publico Sr. Dangui Oduber y Sra. Loma Parkins, directora di “The Caribbean Accreditation Authority for Education in Medicine and Other Health Professions” a firma un acuerdo pa apunta e organo di acreditacion CAAM-HP, pa acredita scolnan di medicina estableci na Aruba, pa asina garantis e calidad y nivel di educacion. CAAM-HP ta un organizacion internacional reconoci cu ta acredita universidadnan pa asina brinda e studiantenan cu finalisa nan estudio di MD, e oportunidad pa continua nan estudio na Merca.

CAAM- HP ta conoci den e islanan CARICOM. CAAM-HP ta reconoci door di ECFMG y por evalua e curiculo di educacion y acredita facultadnan di medicina. Na Aruba no tin un sistema pa controla e calidad di e estudionan. Cu e acuerdo aki CAAM-HP ta e instancia cu ta bay controla y acredita e universidadnan di medicina na Aruba. Minister Endy Croes a enfatisa di ta hopi contento cu e acuerdo aki. Awo, e universidadnan di Aruba por aplica CAAM – HP. CAAM - HP ta laga nan expertonan haci



control na Aruba pa asina por acredita nan. Merca ta reconoce CAAM -HP como un di e autoridadnan cu ta controla estudio di medicina. Esaki sigur ta un logro pa Aruba. Minister Endy Croes ta gradici tur e profesional-, ministerio- y departamentonan di gobierno a traha hunto pa awe por a logra esaki pa Pais Aruba. Minister Endy Croes ta felicita y gradici Sr. Andin Bikker cu a lidera e proyecto aki y colega Minister Dangui Oduber pa su excelente cooperacion. Pabien na Pais Aruba cu e logro aki.



Departamento di labor (DPL) tin como meta principal, pa aloca e comunidad local riba e mercado laboral. Haciendo esaki pa añas, DPL a tuma nota cu tin un necesidad na informacion y guia, pa con mester prepara pa subi e mercado laboral na aña 2023. Pa e motibo aki, DPL a uni cu Departamento di Asuntonan Social y Centro di Hoben y Famia, pa bin cu un proyecto na unda lo bay duna training, pa yuda esnan cu mester y ta desea un trabou.

Señor Richenel Stamper di DPL, a indica cu nan rol den e proyecto aki, ta riba e aspecto di e persona su derecho y obligacionnan como un buscado di trabou y tambe e preparacion necesario pa por pasa door di un entrevista laboral cu exito. Manera ta conoci, un entrevista laboral ta pisa masha hopi mes pa haya un trabou. Esaki a bira un drempel pa hopi hende, mirando cu nan no sa kico lo spera nan durante e entrevista, ni tampoco kico nan mester tin den nan man pa haya un trabou. E proyecto aki, como un "pilot proyect", a cuminsa cu e grupo di hende muhe. Pa esnan interesa, por cuminsa registra pa participa na e proximo workshop. Na final di e training, lo otorga un certificado di participacion.



Minister di Labor Glenbert Croes ta encurasha tur esnan cu ta desea di progresa, pa aplica y participa na e sesionnan aki, pa asina por ta bon prepara pa un entrevista di trabou exitoso.



Union ta e forsa di un ekipo, famia y
nacion pa logra cada meta pa e
bienestar humano. Ban sigui den
positivismo pa engrandece nos pais.